

15 DEC 2001

Mahathir-puak

PUAK ISLAM DI SETIAP NEGARA INGIN JATUHKAN K'JAAN, KATA DR MAHATHIR

KUALA LUMPUR, 15 Dis (Bernama) -- Setiap negara Islam mempunyai puak yang ingin menjatuhkan kerajaan kerana kononnya kerajaan yang ada adalah sekular dan tidak Islam, kata Perdana Menteri Datuk Seri Dr Mahathir Mohamad.

Beliau berkata puak-puak ini melancarkan serangan untuk menggulingkan kerajaan dan akibatnya, kerajaan yang mentadbir tidak dapat memberi tumpuan kepada pembangunan dan pertahanan negara.

"Di Afghanistan, puak ini telah menjatuhkan kerajaan dan mereka kemudian merebut kuasa bagi diri sendiri," katanya dalam perutusan Hari Raya Aidilfitri yang disiarkan melalui Radio dan Televisyen Malaysia (RTM), TV3 dan Astro malam ini.

Katanya kepimpinan negara Islam seperti itu hanya berharap kepada semangat berjihad kononnya tetapi pertahanan negara diserahkan kepada pasukan yang tidak berdisiplin, tidak terlatih dan tidak tersusun secara tentera.

"Adakalanya budak belasan tahun yang tidak pun dapat memikul senjata, tidak tahu menggunakannya dihantar ke medan perang untuk berjihad dengan menjanjikan bahawa tempat di syurga dijamin, seolah-olah ada manusia yang boleh menjamin sesuatu di akhirat, mengambil alih kuasa Tuhan," katanya.

Katanya apa yang berlaku ialah kerajaan dan puak yang begitu berani berjihad telah lari berselerak apabila diserang.

"Rupa-rupanya mereka sendiri tidak begitu ingin menjadi korban perang dan mati syahid," kata Dr Mahathir.

Hari ini, katanya, tidak satupun negara Islam yang dapat dibangunkan dan mampu mempertahankan umat Islam dan negara-negara Islam.

Beliau berkata keburukan itu datang daripada orang Islam sendiri, yang tidak mematuhi ajaran Islam sebenar, yang berpecah-belah serta yang tidak berusaha untuk membangun dan menguatkan negara Islam.

Perdana Menteri juga berkata umat Islam di negara ini dalam merayakan Hari Raya tidak harus melupakan akan saudara seagama mereka di negara-negara lain yang tidak dapat merayakan hari kebesaran itu.

"Kita tidak patut lupa kepada mereka yang terpaksa tinggal di kem-kem pelarian yang amat daif, yang terdedah kepada kesejukan yang tidak terhingga di musim salji ini, yang mempunyai hanya khemah-khemah yang koyak-rabak, tidak berselimum, tidak ada makanan dan ubat untuk yang sakit," katanya.

Katanya lebih tiga juta rakyat Afghanistan terpaksa lari dari negara mereka untuk menyelamatkan diri daripada bom dan roket dan bagi mereka tidak ada suasana raya pada hari yang mulia ini.

"Tidak ada juadah, bahkan tidak ada makanan. Kanak-kanak tidak ada pakaian baru, hanya kelaparan dan menggigil dengan kesejukan," kata Dr Mahathir.

Di Palestin pula, penduduknya tidak dapat merayakan Aidilfitri dengan sempurna kerana Israel menyerang wilayah Arab-Palestin dengan kereta kebal, roket dan bom.

Katanya mungkin serangan Israel disebabkan oleh keganasan rakyat Palestin yang meletupkan diri dan membawa maut dan cedera kepada sebilangan orang Israel.

"Tetapi kita perlu mengutuk juga orang Israel dan kerajaan Israel sebagai pengganas. Bagi tiap seorang Israel yang terbunuh, empat rakyat Palestin yang dibunuh oleh tentera Israel," katanya.

Dr Mahathir berkata tentera Israel di bawah arahan kerajaan Israel tidak kurang ganasnya bahkan lebih ganas dari tindakan balas rakyat Palestin "tetapi kerajaan Israel dan tentera Israel tidak dikecam sebagai pengganas oleh dunia Barat."

Sebaliknya, Presiden Yasser Arafat didakwa sebagai ketua pengganas kerana tidak memberkas orang Palestin yang mengganas sedangkan Arafat bukan presiden negara yang bebas dan berkuasa penuh.

"Apakah mungkin pemerintahan Arafat membendung dan mengawal rakyatnya yang amat marah kerana kehilangan saudara-mara, anak cucu dan kawan rapat yang telah dibunuh oleh Israel?"

"Kerajaan yang penuh berkuasa pun tidak dapat memberkas semua penjenayah dalam masyarakatnya apatah lagi kerajaan Arafat yang tidak diberi kuasa yang sepenuhnya," kata Dr Mahathir.

-- BERNAMA

SR DC MAI